

Poetry Slam in Engiadina

Janic Maskos/GiuRu

«Üna collavuraziun cun Mia Iva da Tschlin?» – Chi chi segua a l'Uniun dals Grischs sün Instagram nu varà survis il post avant ün pêr eivnas. Üna butiglia da vinars verdaint davant ün scrignöl vegl antic – illa fotografia mancan be il zanins. Forsa suna i'l chaschuot, sper alch rispli, üna penn'ed ün pêr fögls?

Lungas nu laina far, perche patafchar, scriver o dessa dir slammar intuorn la buoglia, l'aua viva, l'iva? Precis per quella giaraja nempe al prüm POETRY SLAM Engiadinais.

POETRY SLAM. Tenor la legenda ün'occurrenza fundada dal lavuraint da construcziun e poet *Marc Kelly Smith* i'l Chicago dals ons novanta. Al slam pon preschantar persunas lur texts scrits sves ad ün public chi elegia a la fin ün victur o üna victura. Per Marc Smith es quai chi quinta la libertà dal poet e da la poetessa illas poesias. Admetter tuot ils stils e genres litterars, per profitar da la pussibilità da schlargiar la poesia, impè da tilla restrendscher sco chi s'ha fat i'l passà.

Il contact direct dal public cul poet dess esser l'elemaint central da l'occurrenza. L'acziun, la poesia – la reacziun, l'applaus. Üna sort dialog chi s'ha schliada fingià lönch da l'inglais e derasad'eir in otras linguas. In tscherts ravuogls esa perfin dvantà ün tschert cult – üna nouva fuorma da cultura litterara. I basta da dar ün cuc illas registraziuns dal poet tudais-ch *Dalibor* o a la poetessa *Julia Engelmann* per realisar ch'ün tal format manca illa Rumantschia. Ün format independent da l'età, da la professiun, dal stüdi o da l'idiom. Chi nun ha dabsögn da la rait sociala, da la televisiun, dal radio ed amo main d'ün cudesch. I dess dvantar üna nouva plattafuorma.

Originalità.

Original est, originala dess esser la poesia.

Libertà.

Liber est, libra dvaint'la, la poesia.

Respet.

Respett'a tai, respet survain la poesia.

Üna plattafuorma per newcomers? SCHI! Perche? Cun quai ch'eu tem chi nu detta inamöd amo ingüinas slammadras ed ingüens slammaders cun experienza in ün slam rumantsch. I's tratta d'ün spazi intant amo liber chi grazch'a l'Uniun dals Grischs po gnir üttilisà, survgnir üna fuorma, üna dinamica, forsa perfin dvantar ün curraint.

I vala la paina, na be pell'iva.

I vala la paina, pella poesia.

Da's participar.

Preschantar.

O.

Tadlar.

* Tuot quels chi han gust da gnir a tadlar al slam sun invidats a la Grotta da Cultura a Sent, ils 15 d'avrigl 2023. La bar driv'a las 19.30, il slam cumainz'a las 20.00. Entrada libra cun collecta. Moderaziun: Romana Ganzoni.

* Chi chi vess vöglia da participar cun ün agen text o in cas da dumondas as po jent annunzchar pro l'UdG: info@udg.ch



Per ulteriurs posts seguir a [@uniun_dals_grischs](https://www.instagram.com/uniun_dals_grischs) sün Instagram.

FOTO MAD